



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :



Tir Yimym



tiryimym@aolima



tir yimym

TAPAK 8

Ukraine telungi NATO aitra World War III tenziüksü: Putin

Alcaraz & Swiatek nati Indian Wells ATP-WTA asayamung kokogo



Swiatek

VOL. XXI ISSUE NO. 156 (ADOK 156)

DIMAPUR SANGTENNÜ (TUESDAY)

METSÜREMI (MARCH) 19, 2024 ₹ 5.00

Sovima nung North East Games 2024 tenziükogo



Dimapur, March 18, 2024 (TYO): Nagaland Chief Minister Neiphiu Rio-i Hombar nikongdang 3 buba North East Games 2024 tenziüksüogo.

Iba asayamong ya Nagaland state-i Regional Centre for Sporting Excellence, Sovima nung ayonga amonger.

Northeast state 8- Arunachal Pradesh, Assam, Manipur, Meghalaya, Mizoram, Nagaland, Sikkim aser Tripura nungi saisaponger 3,000 temai disciplines 15 nung tokteptsü. Chumoükedima, Dimapur aser Kohima district asem kübok venues 12 nung asayamong amongtsü.

"Northeast nung saisapongbaren tejakleni aotsü atema lenmang sadema lir aser iba nung asenok shingaiia noktangtsü makok. Asenok kati ka maneni yariteptsü aser linük nung northeast ya sports power

kümdaktsütsü" ta CM Neiphiu Rio-i ashi.

North East Games ajanga sportsmanship aser northeast state tem longjemtsü atema mangdang sayur, ta pai ashi.

"India nütsüng yongsük nung northeast region nung 3.1% dang lir saka Rio 2016 Olympics nung India tenüng nung shilem agiba saisaponger 6.72% ji northeast nungi liasü. Asenoki saisapongba sabang amshia telongjem akangshidi" ta CM Rio-isa ashi.

Pa ya Nagaland Olympic Association (NOA) nung president lir.

"Nagaland-i aruba saisapongertem pei state tenüng nung adenba ya takok lir. Iba ajanga pei pei state tem asoshi konang bentsür arutsü aser asenok tali longjemtsü ajungmesotsü" ta CM Rio-isa shisem.

Tanü Tuensang ghonda 12 mokdang

Dimapur, March 18, 2024 (TYO): Eastern Nagaland region ajunga nung public emergency aliba ajanga March 19, 2024 nü Eastern Nagaland Public Meeting nung adeni arurtem nija gari nung arutsü aser personal bodyguards manitsü tetuyuba agütsüogo.

Iba senden ya Tuensang Headquarter nung ENPO-i ayongzüker aser Eastren Nagaland Public Emergency Control Room Tuensang Headquarter ajanga tanü iba tetuyuba agütsü.

Public meeting alitsü atema Tuensang jila nung March 19 anepdang 6:00 nungi nikongang 6:00 tashi shishilembadak ajak shibangtsü, garitem mesenzütsü, shisaliok rejutem shibangtsü aser public senzüsensong masütsü tetuyuba agütsüogo.

Ajisüaaka meeting nung

adentsü atema arurtem medical emergencies aser fire & emergency services tenokdangba kübok madener, ta ENPO-i ashi.

Eastern Nagaland MLA temi ENPO dang senden thinentsü mepishi saka ibaji pamoki magizük.

"Ghonda ka jungnüa olemtepa sülen senden methientsü lemtetogo. March 14, 2024 nü Tuensang nung ENSF-i senden ayong saka ENLU züngsemtem ajak New Delhi-i aoba agi March 19 nü thinen" ta ENPO-i ashi.

"Külen, ECI-i Lok Sabha 2024 osang metetdaksüba sülen Election Model Code of Conduct tenziükogo anungji central lennirtem den ajuruteptsü nungdak madoker. Anungji ENLU züngsem ajak iba senden nung arua adentsü metetdaksür" ta ENPO-i ashi.

Election Commission-i tongti ketdangsür aika mapa melentsür

New Delhi, March 18, 2024 (Agencies): Hombarnü Election Commission-i Gujarat, Bihar aser Uttar Pradesh nungi ketdangsürtem dena Home Secretary 6 tashi agientsü tetuyuba agütsüogo.

ECI-isa West Bengal Director-General of Police Rajeev Kumar mapa belentsü tetuyuba agütsü.

Iba ajanga taoba mapang Director-General aser Home Guards Commandant inyaker Vivek Sahay maneni West Bengal DGP shimogo.

Election Commission-i election matongdang ketdangsürtem melenshiba ya yimya dang aser parnoki Jharkhand, Himachal Pradesh o Uttarakhand Home Secretary tem den Mizoram aser Himachal Pradesh Chief Minister office nung tongti ketdangsürtem mapa belenshiogo.

ECI-isa Brihanmumbai Municipal Corporation nung Commissioner Iqbal Singh

Chahal aser Maharashtra kübok tesem balala nung ketdangsürtem agienogo.

2024 Lok Sabha election agitsü ita ka majung lia ECI-i Honibarnü April 19 nungi June 1 tashi shilem tenet lemsar Lok Sabha election agitsü osang metetdaksü liasü.

Chief Election Commissioner Rajiv Kumar aser pa den yariteper nübo tasen ana- Gyanesh Kumar o Sukhbir Singh Sandhu nung senden ka amenba sülen ECI-i ketdangsürtem agientsüba tetuyuba agüja liasü.

Lok Sabha aser Assembly elections nung party ajaki kasa jenjang nung shilem agitetsü atema ECI-i mapa inyaker.

ECI-i agienba ketdangsürtem ya pei pei chief minister indang office nung mapa anana benloker liasü aser iba ajanga tim masüba inyakyim alitsü mesüra polling nung law-and-order dak sendakba timtem ajurutsü akok ta ECI-i ashi.

Uttar Pradesh nung Principal

Secretary to Chief Minister Yogi Adityanath Sanjay Prasad nem 2022 küm Home Department indang additional charge agüja liasü.

ECI-i DGP Rajeev Kumar mapa nungi anentsüba atema Trinamool Congress-i aitsüogo.

Kumar ya Chief Minister Mamata Banerjee'er party den tesentaktep tajung aliba nisung ka ta opposition-i ashir. Tesüiba nunga West Bengal sorkari election atongtsü lia tongti ketdangsürtem mapa melenshiba atema ashishitepogo.

BJP-i ECI ama teloktem amshia election nung takok angutsü meranger ta TMC lennir Kunal Ghosh-i ashi.

"BJP-i par state unit yaritsü meranger kechiyong election nung parnoki menden aika nung tamakok angutsü ta meteta lir. BJP-i ketdangsür kar mapa belenshitsü akok saka public bo Trinamool Congress aser didi (Mamata Banerjee) den dena lir" ta Ghosh-i ashi.

NPCC-i Mar 26 nungi nüboyimba maparen tenziüksü



Kohima, March 18, 2024 (TYO): Nagaland Pradesh Congress Committee (NPCC)-i Nagaland nung alirtem dang Lok Sabha elections nung Congress candidate yaritsü mepishia metetdaksüogo.

"Onoki asen state temetentem atema bendanga agüja raratsü aser iba atema NPCC-i asen voters dak teimla tulu lir" ta NPCC president S. Supongmeren Jamir-i ashi.

All India Congress Committee (AICC)-i Nagaland nung Lok Sabha election nung Congress candidate asütsü atema Supongmeren shimogo.

"Nagaland nung vote enoktsürtemi secularism pusemstü imlar aser Congress-i secularism atema noktaker. Taruba Lok Sabha elections nung Naga nungeri India/BJP sorkar dang asenoki teti ochi atema noktaker aser teti telongjem atema noktaksü ta ashitsüla" ta Congress Bhavan nung osangbener den jembidang Supongmeren-i ashi.

Nagaland nung Congress-i party ticket agütsüba sülen March 26 nungi election campaign tenziüksü imlar.

NPCC-i Nagaland atema star

campaigners 31 shidangogo ta Supongmeren-isa ashi.

AICC-ia Nagaland dangi star campaigners yoktsü aser NPCC-i Rahul Gandhi, AICC president Mapanna Mallikarjun Kharge aser Priyanka Gandhi nunger yoktsü mepishitsü ta paisa ashi.

BJP sorkari Naga yimten tebilemstü sota lir:

BJP sorkari agreement 2 nung ajemdaker Naga yimten tebilemstü sota lir aser Naga yimten tebilemstü tenüng amer opposition maliba sorkar akümtsü mapa inyak ta paisa metetdaksü.

Assembly nung Opposition melira asen nübortem, Naga yimten tebilemstü aser state renloktsü atema shibai ola adoktsü? ta NPCC President-isa asüngdang.

Nagaland nung MLA 60-i Naga nunger asoshi bilemstür saka parnok BJP high command kübok aliba ajanga state khurettem atema mapa meinyakteter, ta paisa ashi.

"Chief Minister Neiphiu Rio tensa tamajung ka nung lir aser pai tugutsü merangra par rong tzi telungi aitsü. Opposition maliba sorkar ya RSS- BJP ajanga ketdangsür aser India sorkar

dangi abentsü makoker kechiyong parnok BJP High Command ajanga anishir" ta Supongmeren-isa ashi.

"Asenoki asen tebilembatem sayutsü mapang tongja tongogo ta NPCC-ibo bilemer. Asenoki asen secularism atema raratsüla" ta pai ayongzüker.

Iba atema Parliament nung nisung ka alitsüla aser Nagaland sensotem atema jembitsüla. Nisungtemi tejakleni arutsüla aser India sorkar dang nungi temeten meshitsüla, ta Supongmeren-i ashi.

ENPO-i akhangba ya tim dang:

ENPO-i akhangba aser parnoki central o state elections nung shilem magitsü atema asüngdangdang "parnoki akhangba ya kanga tim aser iba atema parnok kuli peria lir" ta Supongmeren-i langzü.

"India sorkari asen ENPO adianutem mesüshir aser ibaji parnoki akhangba magütsür. ENPO-i parnok tejashi sayua aser India sorkar dak temulung malemer ta shia taküm Lok Sabha elections nung shilem magitsü lemtetogo, kechiyong India sorkari parnok nem temeten magütsür" ta pai ashi.

Lok Sabha Election 2024 atema Mkg nung senden amen



18th Lok Sabha Election 2024 asoshi terenemshiba ka ama District Level Standing Committee senden ka March 18, 2024 nü Deputy Commissioner, Mokokchung indang Conference Hall nung mena liasü.

Dimapur, Metsüremi/March 18 (TYO): 18th Lok Sabha Election 2024 asoshi renemshia District Level Standing Committee senden ka March 18, 2024 nü Deputy Commissioner, Mokokchung indang Conference Hall nung mena liasü.

Deputy Commissioner & District Election Officer, Mokokchung, Thsuvisie Phoji ajanga tarur pela agizükba den külemi Superintendent of Police tasenba, Vesupra Kezo metetpelatepa liasü.

Election ochishia, talenba makai tesunep nung agitetsü kanga tongtipang, anungji political party lenirtemi yimya tajung amshia tatishitsü

sayutsüla, ta DC-i ayongzuka liasü.

Pai district balala den amalitep akatsü aser Election Commission ajanga guidelines agütsüba ama election shidak agütsü ajungmesoa liasü.

Assistant Election Officer, Mokokchung, Renben Mozhu-i election mapang child labor samadaksütsü tongtipang ta ashi aser party workers nem awareness agütsütsü nungdak ta shia liasü.

Ajit Kumar, IAS, Assistant Commissioner ajanga Model Code of Conduct indang rateta ashi aser tamangba yimsü mesüra kin anema mapa tamajung meinyaktsü, süpokrem

magütsü aser dangar den rara memenatsü ayongzuka liasü.

Election mapang Model Code of Conduct (MCC) nung aibelenba osang agütsütsü atema Election Commission of India (ECI) ajanga yangluba mobile application cVIGILApp amshiyim sayua liasü.

Iba app amshirtemi aibelen tabu balala nungi shimteter tatalokba tejangja osangbener nem agütsütsü akok.

SP Mokokchung, Vesupra Kezo-ia ozüing amshirtem den tashi angateptsü tongtipang aser election tesunep nung agütsü nungdaker ta nenshia ashi. Pai social media tim masüba nung mamshitsü tekumdangtsü shia liasü.

DC & DEO Mokokchung ajanga printing press dang metetdaksür

Dimapur, Metsüremi/March 18 (TYO): Deputy Commissioner & District Election Officer, Mokokchung, Thsuvisie Phoji-i Mokokchung district telungzük aser temeket nung aliba Printing Press ajanga dang Election Posters, Pamphlets amala menungtsü atema guidelines kar agütsüogo.

Press ajanga menünga materials nung printer aser publishers tenüing aser address tejangja sayutsüla, ta ashi.

Printing press temi printed materials copy pezü den publishers-i sandongba anogo asem tsüingta office of the Deputy commissioner &

District Election Officer nem agütsütsüla.

Election pamphlets, posters menünga shia printing press ajanga copy kwi menüing aser sen kwi meshi, item ajak tejangja document menünger anogo asem tsüingta office nemo sang agütsütsüla.

District kübok aliba printing press ajungai iba totuyuba sülen anidaksütsüla, aji mesüra state indang tapet ozüing agi alentsü, ta sangdong ajanga ashi.

Ano maneni DC & DEO, Mokokchung ajangasa Mokokchung District kübok posting aliba sorkar mapa inyaker ajak station nung alitsü

metetdaksü.

Heads of offices ajak aser par kübok aliba ketdangsur aser staff ajak pei mapa inyakba tesem nung alitsüla. Official duty nung station leave asoshi DC nungi temelaba agütsüla aser item duty indang osang tejangja agütsütsüla.

Sorkar mapa inyaker medical ground nung leave agir alirtema medical board matsüingdangi tsüingdong jaoktsü.

Aibelenba ketdangsur dang RPAct 1951 indang section 134 nung aliba ama merenshitsü, ta DE & DEO Mokokchung sangdong ajangasa ashi.

DC & DEO Kohima aser political party ketdangpur senden amen

Dimapur, Metsüremi/March 18 (TYO): 18th Lok Sabha atema General Election agütsü aliba atema Deputy Commissioner & District Election Officer, Kohima ajanga Kohima District kübok aliba Political Party nungi ketdangpur den Model Code of Conduct, Election Expenditure Monitoring aser IT dak sendakba Apps (SUVIDHA & cVIGIL) asoshi senden ka March 18, 2024 nü NIC Conference Hall, DC's Office Kohima nung mena liasü.

Iba senden nung Additional

Deputy Commissioner Kohima, Rhosietho Nguori, NCS menden liasü aser pai political party ketdangpurtem dang election dak sendakba nung 'shortcuts' mali ta ashi aser Election Commission of India-i sangdongba ama Model Code of Conduct sülen anidaksü ayongzuka liasü.

SDO Hq. Kohima & Nodal Officer, MCC, James Renbi aser Assistant Election Officer, Kohima, Olivi Thurr nungeri MCC, Election Expenditure Monitoring, Media Certification,

defacement of flex, posters aser danga political advertisements indang rasaa ashi.

District Informatics Officer (DIO), J.G. Lorin-i SUVIDHA Apps. (Apps for online Nomination and Permission) indang rateta ashi aser anogo ana jelia PDF format nung nungdakba documents agütsütsü ayongzük.

Sr. Programme Officer, IT department, Samuel-i iba senden nung cVIGIL Apps. (Apps for online certification and complaints) amshiyim indang rateta ashi.



BJP Mokokchung district kübok Kisan Morcha ketdangpur tasen shima liasü. Ketdangpur tasen rongnung Tiawati, Arishilu aser Rongsenwati nunger vice president shim, Tiajungla general secretary (Org) aser Lanumeren secretary shim. Parnok shimba shiti ya Kisan Morcha tir Rongsenyanger-i amokja liasü.

DC Mokokchung ajanga Model Code of Conduct sangdonggo

Dimapur, Metsüremi/March 18 (TYO): Deputy Commissioner aser District Election Officer, Mokokchung, Thsuvisie Phoji-i nürburtem dang sangdong ka nung, Election Commission ajanga 18th Lok Sabha Election 2024 sangdongba sülen district nunga Model Code of Conduct (MCC) benokogo, ta metetdaksü.

Election Commission of India ajanga agütsüba Model Code of Conduct sülen sorkar ketdangsur, political party, candidate temi anidaksüla, ta metetdaksü.

Aibelener nem ozüing agi melaba ama tapet temerenshi agütsütsü.

Rally, public meeting aser procession densema political inyakyim ajak MCC nung aliba ama asütsüla. Political gathering atema tim ketdangsur nungi

temelaba agütsüla, ta ashi. Political party mesüra candidate temi political mapa mesüra nübuyimba mapang government machinery, resources aser facilities kecha mamshitsü. Yangji gari, tesem, sepai aser sorkar meyong osettsüset ajak dena lir.

Election maparen sunepa tembangtsü asoshi district ajanga nung law and order amshitsüla. Azüdokshiba, dangar amokmerenba mesüra tashiyim amshiba ajak ozüing amshitemi atsü-anem makai aser telemsa makai merenshitsü.

Mokokchung District kübok 18th Lok Sabha Election asoshi department balala aser ketdangsur ajaki item totuyuba shidak amshitsüla aser MCC sülen anidaksüla, ta sangdong ajanga ashi.

Digital India Northeast Regional Workshop nung IT&C Dept. nungi aden



Dimapur, Metsüremi/March 18 (TYO): Shillong nung March 18, 2024 nü Digital India Northeast Regional Workshop on India Enterprise Architecture (IndEA) aser Meghalaya Enterprise Architecture (MeghEA) sentong nung State tenüing nung Mohammed Ali Shihab A., IAS Secretary, IT&C and Economics & Statistics lenisüba kübok Department of IT&C nungi ketdangsurtem oa dena liasü.

Iba Regional Workshop nungya Ministry of Electronics and IT (MeitY) nungi S. Krishnan, IAS, Secretary aser Abhishek Singh, IAS, Addl. Secretary and President and

CEO, National e Governance Division; North Eastern States ajanga nungi ketdangsurtem aser North easterns states ajanga nungi NIC ketdangsurtem dena liasü.

Iba workshop nungya IndEA, digital service and standards aser tajangzük angubatem indang sayua liasü.

Iba sentong ayongba state, Meghalaya ajanga MeghEA, eProposal System aser Meghalaya ONE indanga sayua liasü. State shiai IndEA & MeghEA indang workshop nung self assessment, institutional and resources planning, capacity building aser presentation agüja liasü.

Mkg district Congress party pur lokti senden jateper

Mokokchung, 18th March (TYO): Aruya aliba Lok Sabha Election koba 19th April, 2024 nü agütsüba lir, iba dak sentakba nung election campaign sentong den tanga maparen kar jembishinütsü asoshi Mokokchung district Congress party pur lokti senden ka 22nd March, 2024 (Hogulbarnü) anepdang 11:00 ako nungi tenzuka Mokokchung Town Hall anasa aliba Sangtemla Community Hall nung alitsü, ta Mokokchung District Congress Committee (DCC) tir, Watimongba Aier aser tongti

zülur (Admin), P. Aley-i osang ka ajanga metetdaksü.

Anungji, agüja aliba item kija/telok – Mokokchung district nungi taoba MLA/INC candidate-tem, district nungi PCC member-tem, district nungi NPCC secretary-tem, Advisor ajak, Frontals - (Mahila/Youth/Seva Dal/NSUI) ketdangpur ajak, 10 ACCCs aser Unit balala nungi ketdangpur ajak, ACCCs 10 nungi BLA-2 ajak, DCC ketdangpur ajak iba senden nung medema adentsüla, madeneritem tenük yoka atatsü atatsü ta kasa osang nungsa metetdaksü.



March 18, 2024 nü Telangana kübok Jagtial nung election nüboyim sentong ka nung Ato kilonser Narendra Modi den Telangana BJP Tir, G. Kishan Reddy aser BJP MP, Bandi Sanjay Kumar nungert tangokba noksa nung angur.

SC-i SBI dang Unique electoral bond data sangdongtsü tuyur

New Delhi, Metsüremi/ March 18 (Agencies): Hombarnü Supreme Court-i State Bank of India (SBI) dang electoral bonds alizükertem aser tenla anguba party tem tsüingda tesendaktep jangjatsü atema Unique Electoral Bond Data sangdongang, ta tuyuogo. Chief Justice, D Y Chandrachud leniba nung judge pongui akümba constitution bench-i SBI dang March 21 tashi nung electoral bonds dak sendakba osang ajak sangdongang, ta tuyu. Supreme Court bench-i SBI chairman dang March 21 nü nikongdang 5:00 ako tashi nungbo court-i tuyuba ama inyakogo ta metetdakjang, ta tuyu. Bench nung tanüingba züingsem pezüji Justices- Sanjiv Khanna, B R Gavai, J B Pardiwala aser Manoj Misra nungert lir. Electoral bonds dak sendakba osang soita ayutsü SBI dak temeden mali, anungji bonds alizükertem aser tajangzük anguba party na

tsüingda tesendaktep metettsü atema unique bond numbers densema osang ajak sangdongang, ta bench-i metetdaksü. Electoral bonds ken o nung Supreme Court obendang ajanga bank dang electoral bonds osang ajak tejangja sangdongang ta tuyua lir, anungji iba atemaji tetuyuba tali agütsütsü menüingdak, ta bench-isa metetdaksü. Ken o angadanga mapang nung bench-i, "SBI-i osang kar dang mesangdongtsüla saka electoral bond numbers densema osang tejangja yimjak nung sangdongtsüla," ta metetdaksü. Tamalen-a Supreme Court-i SBI dang, court-i tuyuba ama nenoki kechiba unique alphanumeric identifiers mesangdong, ta asüingdanga liasü. Taküm February 15 nü Supreme Court-i Centre sorkari benokba electoral bonds scheme ya linük temzüng alema lir, ta obendanga agüja iba scheme anenja liasü.

Iba sülen Supreme Court-i Election Commission dang tenla agütsürtem tenüing, sen kwi tenla aser tenla angur party tem osang tejangja March 13 tashi nung sangdongang ta tuyua liasü. Anogo ishika tejaklen SC-i SBI dang, electoral bonds alizükba anogo, alizüker tenüing aser denominations nenoki sangdongogo, ajisüiaka kechiba electoral bonds (unique alphanumeric numbers) mesangdong?, ta asüingdanga liasü. Bench-i SBI dang, nenoki züingdokbaji (numbers) metongshiang aser tesüiba küm pongu tsüingda electoral bond transactions indang osang tejangja agüjang, ta tuyua liasü. Iba ken o angadanga mapang Chief Justice-i, "Shibai State Bank of India atema jembitsür? Parnoki bond numbers magütsü. State Bank of India-i ibaji sangdongtsüla," ta ashi. Iba dak sendakba nung court-i March 18 nü SBI jaoka iba ken o angadang.

Navy temi Somalia nunger tzüyim nung auer 35 India-i anir arutsü

New Delhi, March 18 (Agencies): Honibarnü Indian Navy temi tzüyim nung Somalia nunger auertem apuba den külemi MV Ruen rong nungi nisung 17 kümzükogo; Navy temi Somalia nunger tzüyim nung auer 35 anema ken o akatsü atema India-i anir arutsü. Somalia nunger auertem jagi region nung tanga commercial rongtem amaksü atema MV Ruen rongji amshia liasü. India nunger ozüing kübok parnok anema ken o akatsü. Ketdangser kati, "Tangbo Maritime Anti-Piracy Act ozüing lir; item ama ken o akatsü atema iba ozüing ya yaküm sangdonga liasü. Auer 35 jagi onok indang raraba rong dak injang khaloktsü. Parnok chiokra parnok tanaben longjemtsü aser parnoki maneni tzüyim nung rongtem maaka auyatsü," ta metetdaksü. Iba denji külemi Malta-flagged MV Ruen rong kiburtem den-a tongtepratepa tejembidak lir. Iba rong nungji dollar sen million 1 shi jenjang oset touzük ton 37,800 lir. Rongji-a India-i bener arutsü asü tesem kar nung parnok (kibur) nem agütsütsüar iba atemaji tang tejembidak. MV Ruen rong ya yaküm

December 14 nü Somalia nungi nautical mile 260 shi pilar lia Somalia nunger auertemi pua liasü. Taoba Hokolbarnü Guided-missile destroyer INS Kolkata ajanga MV Ruen ji nokdanga liasü. INS Kolkata rong denji INS Subhadra, P-8I long-range maritime patrol aircraft, drones aser IAF indang C-17 Globemaster-III tayimtsü nungi commando tem teyari ajanga ghonda 40 shi Somalia nunger auertem den rara. "Rong nungi yokba drone ji auertemi khazüka yok aser INS Kolkata dak injang khaloktsü. International ozüing kübok INS Kolkata-i (Ruen) rong steering system raksatsüba ajanga rongji anentsüsa aküm," ta Navy otongdar, Commander Vivek Madhwal-i metetdaksü. Tesüsa Somalia nunger auertem jagi 'surrender' asütsüsa aküm. Iba dak alia rong nung aliba Bulgaria, Angola aser Myanmar nungert 17 kümzükogo. Commander Madhwal-isa, "Southern Indian Ocean Region nung tzüyim nung auertem anema operation takok anguba ajanga Indian Navy-i region nung yimjung atema inyakba aser auertem nokdangtetba kuli sayur," ta metetdaksü.

Election Commission-i state 6 nung home secretaries agientsü tuyu

New Delhi, Metsüremi/ March 18 (Agencies): Hombarnü Election Commission-i state trok-Gujarat, Uttar Pradesh, Bihar, Jharkhand, Himachal Pradesh aser Uttarakhand state tem nung home secretaries agientsü tuyuogo. Mizoram aser Himachal Pradesh state na nung general administrative department nung secretary tema

agianadokogo. Election Commission-isa state ajak nung sorkartem danga election dak sendakba mapa nung sendaktepa alirtem aser pei district nung küm asem abensartem transfer yokang, ta tuyu. Iba dak alia Election Commission-i BMC aser a d d i t i o n a l / D e p u t y commissioners transfer yokang aser nikongdang 6:00 ako tashi

nung report agüjang, ta tuyu. Election Commission-i April 19 nungi June 1 tashi nung Lok Sabha election shilem tenet lemsar agitsü sangdongogo. Hombarnü Election Commission-isa mangatettep aliba West Bengal police tongti, Rajeev Kumariba menden nungi agienogo. 2016 küm assembly election jakdanga pa Kolkata nung commissioner of police nungi agiena liasü.

Bihar nung BJP-i menden 17 aser JDU-i menden 16 nung tokteptsü

Patna, March 18 (Agencies): Taruba Lok Sabha election nung NDA teloktep kübok Bihar nung BJP-i menden 17 nungi tokteptsü aser Chief Minister, Nitish Kumar-i aniba JD(U)-i menden 16 nungi tokteptsü telemtetba agiogo, ta Hombarnü osang ka ajanga metetdaksü. Patna nung osangbenertem senden ka nung BJP General Secretary, Vinod Tawde-i NDA teloktep nung party tem tsüingda menden lemsaba osangji metetdaksü. Bihar nung BJP candidate temi Pashchim Champaran, Purvi Champaran, Aurangabad, Madhubani, Darbhanga, Muzaffarpur, Maharajganj, Saran, Begusarai, Nawada, Patna Sahib, Patliputra, Aara, Buxar aser Sasaram nungi tokteptsü aser JD(U) candidate temi Valmikinagar, Sitamadhi, Jhanjharpur, Supaul, Kishanganj, Katihar, Purnia, Madhepura, Gopalganj, Siwan,

Bhagalpur, Banka, Munger, Nalanda, Jehanabad aser Sheohar nungi tokteptsü. Iba dak alia Chirag Paswan-i aniba Lok Janshakti Party (LJP) telok nem menden pongu (Vaishali, Hajipur, Samastipur, Khagariya aser Jamui) lenzüksüogo. Ajisüiaka Minister Pashupati Paras-i aniba LJP telok nembo menden melemzüksü. Iba dak sendakba tasüingdanga ka langzüdang Bihar BJP Tir, Samrat Choudhary-i, "Pa (Paras) den iba atemaji tang tejembidak," ta dang metetdaksü. NDA teloktep nungsa taoba mapang Chief Minister Jitan Ram Manjhi-i aniba Hindustani Aawam Morcha (HAM) aser Rashtriya Lok Samta Party (RLSP) na nem menden kaka lenzüksü. Bihar nung Lok Sabha election shilem tener lemsar April 19, April 26, May 7, May 13, May 20, May 25 aser June 1 anogotem nung agitsü.



March 18, 2024 nü Dehradun nung training program ka nung election ketdangser kati Electronic Voting Machine (EVM) aser Voter Verifiable Paper Audit Trail (VVPAT) amshiyim sayudang tangokba noksa nung angur.



TIR YIMYIM YIMOBILEM (EDITORIAL)

DIMAPUR SANGTENNÜ, MARCH (METSÜREMI) 19, 2024

Vote shitak agütsüdangdi !

Ano asenok vote meshia election ka arudagi, anungji kechi atema koba telok mesüra shiba nem agütsütsü ? Iba tasüngdangba ya bilemdanga telangzüba bushitsübaaji senso ajak khuret asütsüla. Taoba election-tem aika nung asenok aikati aseni saklokba aser angatetba telok aser candidate nem sarasadema pei vote shitak agütsür südi. Ajisüaka, ano asenok aikati pei vote sen yong yoker südi. Ano, assenok tanüngba purtem aika government mapa yong pei vote yoker alitsü. Ano, asenok rongnung karbo shinga nema vote magütsüdang election aika süidaktsür asütsüa akok. Ano kar meyong vote-bo tangari dang enokja arur südi aser ano asenok rongnungsa karibo pei vote dang masü saka tangar meyonga vote-a aikasa ajentsür alitsü. Ashiko, asenok rongnung kar chirnurtembo election nung pei vote ayokba sen agidang school nunga admission agitsür alitsüa akok. Itemji dang masü asenok karbo asen vote yoka yangluba kidang lia alitsüa akok. Itemji kodang bilemdangdir, asenok taoba election-tem nung pei vote tangatetba agi indangindanga agütsürtem dang nungibo pei vote sen aser mapa yong ayokertemang teimba asütsüa akok. Ibayongji, election nung toktepertem ya temeimsüka aser tesasatsüka sentsüh tulu agi tsübangba yur yimsüsür inyaksü tenangzüka agir. Iba asenoki amangba Yisu yimsü den dang masü saka asenok akhi tsürabur limapur sobaliba dena meputep. Yisu yimsüi dang masü saka asenok sobaliba yimsüia asenok libaliru aser inyaksangshi ajak nung indangindanga inyaksü aser alitsü sayur. Aji oda, asen sobaliba nung sentsüh agi tsübanger tatar menden alanga yimsüsür makümer. Yimsüsür tangar dangi apumesai aotsübaaji maksü liasü. Iba jagi asen sobaliba tajung ta züngshir. Ajisüaka, tanübo asenok Khristan purtema masü aser limapurtema masü ta tetsüngda nung vote ayoker aser vote alir telokang ka kümogo. Vote ayoker asünungji sen sentem tulu agi apua vote alia yimsüsür akümba agi asenok candidate aser asenok MLA-tem dang masü saka asenok ajak sentsütsür kümer, tangar kilir dang nungia teküpbokba jenjang nung tangar lar kümer asenok ola madoktet timtem tia nung lir. Iba asenoki metetsümonga asen temeten sen aser mapayong ayokba agi asenok tajung kümnüseta mekümtet timatemer. Ashir ashi, election nung pei vote ayokba agi taküm piyong anisüngzüka alitsüsa kechi inyaktettsü ? Ashi, asenoki asen vote mayok ser indangindanga asenoki mulungba candidate aser telok nem vote agütsü asübo asena dena nümadangdanga terenlok mapatem inyakba nung asenoki shimba tatar yimsüsürtem den külemi shisa lentong lemsatepa shilem agir süla. Aji oda, asenoki vote ayokba agi election ya vote ayokba aser aliba business mapa-ang ka mesüka kümdaktsüogo. Iba jagi yimten nung alirtema yimten yimsüsür amai masü saka business inyaker nisung amai akümer. Tanü asen lima nung yimten aser lokti khuret abener mali ajak sen bushir nisung akümbaaji , tanga agi masü, asenoki election ya sen aaba mapang amai kümdaktsüba ajanga lir. Tanüa asenok jakdang election ka arudarji, iba election yabo asenoka yimten nung yimsüsür shimba mapa nung indangindang shilem agitsü merangdangba election ka südaktsüdi. Atangji, election nung toktepertemibo kechisüdirsüaka adoknerji tapu aika agi nübertem mesüzütsüa akok, ajisüaka nübertemi sen agi mesüzütsü merangba nisung masü saka lokti nung sensosanger aser yimten khuret meteta bentetba nisung ka shimtsüang bilemstüla. Koma südir, tangbo tendanga, shinga telok aser candidate dang senjang kata memeshii pei sen aser pei nübo endoka election tongpang nung noktadaktsüner. Joko, taoba election-tem nung pei vote peisasa meinoktsüi tangar nem enokdaktsüba matumalem mapatem to anendi aser ano pei vote dang masü saka tangar vote dena enokja inyakba mapatembo maksü aser taaktsü mapa kümdaktsüdi. Idangji dang, ashiko, Tsüngremi Israel nunger nem chuba tajung agütsü ama, asenok nema teindang aser nübertem meimba yimsüsür Tsüngremi agütsütsü. Idangjiang asenok nüchi akümtsü. Atangji, election ya nüchipurtem nem pei yimten nung yimsüsür shimtsü atema agütsüba maongka aser mapang tajung ka lir.

OLEMSABANG

Tanü arogo inyakyim khen reprangshitsü mapang kati menepogo

~ L. Kika Pongener.

Tanü asen lima nung arogotem reprangdanga ora, teimba ka alima lokti-tentet, mulongtet telok (NGO) aser alima yimden yimsusuba bangdak ka mesuka küma-odagi. Arogotem inyakyim reprangdangra, arogo teimba ka, alima lokti-tentet aser sorkar inyakyim den kecha tepila mali meyoktepa kümogo. Yongji, joko tamangertem longjemer akümba arogo, mesura temulong meyipa Yisu Khrista agizükertemi longjemer akümba arogo ka masü, saka alima yimden aser alima loktiliba ka dang mesuka kümogo. Arogo nung Yisu Khrista 'Kibur' masü, saka sen, rongsen aser nisung-ang kibur kümdaktsüogo. Ano kanga-sa tesasatsüka, lim arogo teimba ka nung toklang tenzükertem tsüngda nung tashi aser tekolak raktepba, tsükchitepba, ibala tashitak agi arogo aika temai madok telung nung mokozü alunga shirangdagi. Khristar arogo nung tejak reprangba, tulu-tila bendangba, takar-sensaker bendangba (Partiality) aser onok, parnok, ozü telok, par telok ta bendangba (Ism) airdaktsüogo. Alima tashi nem Khristar arogo moksepdaktsüogo. Arogo nung Yisu Khrista jakla meli-i sama-a odagi.

Tanü jila tulu nung arogo karbo kibong merijang aika, züngsem merijang aika aliba arogo lir, item ama arogo nung toklang tenzükertemi kibong ajungai tsüngdong yia, kipoksem aotsüji kanga dang tamakoktsü. Item ama arogo nung arogopur kija shia pei Tanela nungdak peridaktsütsü aser Tsüngrem o agi mesutsüji tamakoktsü. Ashiko, arogopur züngsem ajungajibo tekülem sentepi marui alitsü sudi...Anungji item santemji Pulpit nungi sayutsüngiba kisung agipo Tanela chiyungtsü peria magütsütetsü sudi. Aji oda, item santem ajungaji awajema kipoki tonga oa Tsüngrem o ashitsü wadang tuluka tamakok nung lir. Atangji, arogo tulu aser nutsüng aika alidak, santem ajungaji awajema tsüngdong oa Tsüngrem o meshitetba wadang tuluka tamakok nung lir ama ajiteter. Aji oda, iba tebilemstü ya koktettsü atema kokrabangla, arogoji tilaba küma yanglur, santemji ayimjema ka danga mezütoki bushia inyaknungdang takok angutsü sudi...ta bilemer. Aji oda, mesura santem samadaktsübaaji Tsüngrem tsüngdang sentsüh tulu asütsü ama bilemer. Ashiko, arogo tulu nutsüng aika sur awajema mebushitetba agi, arogopur aika Para Churches, Prayer Center, tanga Ministry, tanga Denomination sentep nungang oa adener asü (?)...ta khen-khenbo shisadanger. Atangji, khen arok- aroka bilemdangtsüla kar lima ama ajiteter.

Tanü arogotem nung toklang tenzükertem aser Pastor-tem den ajurua, santem pei kija khuret, kibong khuret, chirnur khuret lemsateptsü, mesura counselling agitsü aser Tanela nungdak lemsateptsü mapang monguteter asü (?) Pastor-temi Pulpit nung sayutsüngiba dak alaka kipoki tonga maor asü (?) Pastor-temi office mapa-ang tongtipangba sudaktsür asü (?) Arogopurtem Tanela nungdak meperidaktsür asü (?) Toklang tenzükertem/Pastor-tem ajurutsü kanga tasak asü (?) Arogo nung tongtipang sentong ajak nung, tongti-shilem ajak toklang tenzükertemi dang agir asü (?) Mesura laishirtemi dang agitsüla ta mekazüka ayur asü (?) Arogo nung tetsür nembo tongtipang shilem magütsür asü (?) Tanela sempet akartem tanela sempet amshitsü aser Tsüngrem'er tejembiba, shinba o aser mangdang lemsateptsü sadema melapoktsüi arakbanga ayur asü (?) Tanela nung jangrartem taküm küli ashitsü sadema melapoktsüi ajepbanga ayur asü (?) ...ta khen kanga junga shisadangi.

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Asso. Pastor Women aser Kiyim lanutsürtem sentong agiogo



Impur, Metsüremi/March 18 (TYO): March 15 nungi March 17, 2024 tashi Impur nung ABAM Women Ministry ajanga ayongzüka Associate Pastor Women aser Dorka Cell/ Kiyim Lanutsür sentong kanga takok nung agiogo, ta ABAM Executive Secretary, Rev. Dr. Mar Pongener-i sangdong ka ajanga metetdaksü.

Dorka Cell/Kiyim Lanutsür ya Arogo nung kanga tongtipang telok ka lir. Kibong tim anebalu asüba nung yimjung, tesünep aser temoatsü lir. Yamaji tanü Dorka Cell/ Kiyim Lanutsür ya kibong anebaluba telok lir. Kibong jungra lokti ajak junga alitsü alinung ABAM Women Ministry ajanga parnok dak

temelenshi bener arutsü tashi lir, ta amanga iba sentong ya "Temaleni" omen nung ayongzüka agi.

Tongti O jembirtem; Rev. Tiatoshi Longkümer Pastor, KABA, Dr. Samuel Longkümer, Administrator, SCM, Dimapur, Wt. Imtilemla Longkümer, Principal, Impur Bible Seminary, Wt. Alemla Mozür Secretary, ABAM WM aser Wt. T. Arenla Longkümer, Coordinator, ABAM WM nung nung liasü.

Parnok ajanga tanü alima nung rangben terenlok aliba ajanga kija- kibong aser lokti temaleni atuba aisü nung angur. Yamaji tekübok tiaia aiba lir. Anungji koba, kodang aser

koba inyaka libalirotsü meteta libaliroba nung dang kija, kibong aser lokti temaleni atutsü. Anungji, alima terenlok nung alitsü tim, saka shisa kaa asen tim shilem inyaka shi aser tanela nung lirumedema lia alima nung tesünep aser yimjung bener arua temaleni anir südi, ta jembia tayongzüka tulu agüja liasü.

Ajak agi Arogo 117 nungi Asso. Pastor Women-i anir Dorka Cell/Kiyim Lanutsür 908 arua iba sentong nung aden.

Arogotem nung iba telok ajanga kulisüba mapa tulu inyakang Tsüngrem lenisüba nung kija aser lokti ajak nung temelenshi bener arutsü sarasaem ayur.

India nung General election jakdang Khristantemi lumia sarasademtsü

March 18, 2024: India nung Lok Sabha election agitsü jakdang aser linük nung Khristantem anema inyakba kanga bulua akümba mapang ka nung linük tesem ajaklen Khristan putirtemi Khristantem dang March 22, 2024 nü lumia sarasademtsü mepishia metetdaksüogo.

Catholic Bishops' Conference of India (CBCI) nung secretary general, Anil Couto-i, "Asen linük atema sarasademang, talisa general election atema sarasademang," ta metetdaksü.

March 14 nü pai shidi ka ajanga Delhi tesem ajaklen Khristan putirtem dang ghonda 12 maneni lumia sarasaemtsü metetdakja liasü.

India nung talisa Catholic putirtemia kasa tayongzükbaji agütsüogo.

Delhi nung tongti putir Couto-i, "Sarasadem ajanga asen melungjang Tsüngrem den longjemtsü. Arogo meshitetsü aser asen linük ajungtsü atema

sarasademang," ta metetdaksü.

Indian Parliament nung Lok Sabha menden 543 atema April 19 nungi June 1 tashi shilem tenet lemsar election agiba sülen June 4 nü election agiba osang sangdongtsü.

Iba dak alia kasa mapang nungsa Andhra Pradesh, Arunachal Pradesh, Odisha aser Sikkim state tem nunga assembly election agitsü.

Kerala state kübok Trivandrum nung tongti putir, Thomas J. Netto-ia Khristantem dang linük nung minorities anema inyakba nokdangtsü atema lumia sarasademang, ta metetdaksü.

Netto-isa, 2014 küm India nung Khristantem anema inyakba tatalokba 147 dang liasü saka 2023 küm nungbo Khristantem anema inyakba tatalokba 687 liasü, ta metetdaksü.

Bengaluru nung tongti putir, Peter Machado-i, linük nung sensakertem aser takartem tsüngda ongdang tuluba kümogo, ta metetdaksü.

Machado-i yimtenren party balala nungi lenirtem ajak dang linük temzüng wazüka ayutsü ayongzüka den külemi sensotem danga taruba election nung kanga shisa kaa vote agütsütsü mepishia metetdaksüogo.

Tawa 36buba CBCI senden nung linük nung telemsa adokba aser Khristantem anema inyakba teblemtsü onüktem lemsatepa liasü.

Parnokisa linük temzüng kübok inyaksü aser democracy wazüka ayutsü atema lenirtem shimtetsü nungdak, ta bangjemba den külemi Khristantem reshikangshi liaka Arogoi maneni sensakertem tenzüksü bangjema liasü.

India nung secular maitsü samadar ta bilemba mapang ka nung putirtemi sensotem dang kanga shisa kaa vote agütsütsü ayongzüker. Putirtemisa Manipur nung Khristan majority Kuki nung aser Hindu Meitei nung tsüngda yimjung alitsü atema ayongzüker.

ANOGO ABEN TSÜNGREM DEN

Sannükertemji San Rizüngertem

"Atangji sayuba den apetba o nai jembiang".

Tita 2: 1.

Tanelatem angatetsü tanabuba teyariji temeshi nisung aser Tsüngrem kilirtem nungi arur. Khristan shinga peisasa agi teperi masü, Arogo kecha iba kisüng agi teperi mesütet. Kati ka yaritsü nungdaker. Mopung aser yipru noktangtetsü asoshi lim arogo aser rangpen yariteptsü tenüngdaksü. Oli aruli ta aonba mopung nungi kümzüksü asoshi Tsüngremi lim arogo nung tenzüka mapa balala agutsü (Ef 4: 11-16). Yirusalem arogo Mungdang nung Yihuda nung tamangertem aser Bendanger tamangertem tsüngda nung timtem adokdang Peteri Tanela Temeshi yokba küli asüba Yakobi iba indangji "kechi zülua" lir ta meyip (T.M 15: 6-9, 13-17). Iba nungi tepela, tajungshiba aser tashi angu (tt 30-32).

Tambur aser tanishir akhumtsübuba tetezü Arogo otsü bushiba. Parnok dang nungi mapa tasen aika ngutetter, aser Arogo tesayubaji asüngteta sayur. Arogo nung asentenshi mapang Satani kanga aritepa mapa inyaker.

Zülua aliba nungi Satan mapa aser Tsüngrem Tanela mapa bendangtetsü akok. Ano tasadangba kaji "Tanela süngjangtem". Saka "süngjangji" taküm aliba yimya (life style) masü, osangtajungji kanga tashi tait. Nai aji me yoktepa sayuaka iba nungi tajung karbosa adoker. Iba yagi na tanisadaksü. Sayatenya mapa, taneptsüba inyaker aser tagizüker nai koda ratettsür. Telangzübaji tongmelang. Tsüngremi meimchir odang meimer, anungji Pai asenok tenzüka mapa amshir, sayatenya mapa inyaksü atema dang masü. Yisui nütsüngtem dang ashi, "Ni lokti asoshi aria bilemer" (Mt 14: 15; 15: 32).

Tiyazü tesayur metettsü kü nem shisatsü aser temetetba agujang, Kibuba.

AO BAPTIST AROGO MUNGANG (ABAM)
 IMPUR-798615, MOKOKCHUNG, NAGALAND: INDIA
 E-mail: abamimpur7@yahoo.co.in
 Website: www.abamimpur.org

METETDAKTSÜR

Aor kaket ken-o-zülü balala; Arogo aser Lokti anaprongla asoshi zülubatem nungi küm shia tajungtiba shimteta 'ABAM Book of The Year Award' agütsür.

Kaket ken-o zülurtemi 2024 küm asoshi teküboklen agüja alibatem nungi leniba agia meranga züluba nung shilem agitsü ajungshir.

I. Kaket shimyim yamai alitsü:

1. Kaket tezülur shisatsü nungi atokba (Original) asütsüla.
2. Kaket zülü nung asalentong tasen (Creativity) aketba.
3. Kaket züluyim shitak (Methodology) amshitetba.
4. Tapu aser pongtem züluba nungi tarensen (consistency) shitak amshitetba.
5. Tazüngertem tajangzüker katetsüsa (Utility) züluba.
6. Tapak 100 tema züluba kaket asütsüla.

II. Kaket züluba Oshi: Ao aser English nung züluba nungi ka-ka shimtsü.

III. Tezülur shimba nung adenba: Iba Award shimba nung shibaisa adentsü mulungdir, pei züluba kaketi copy asem (3) kaket adokli tekaraba nung Mungdang nem agütsütsü. Iba kaket ABAM meyong asütsü. Panel of Judge-i kechi kaket shimdir, Senpetji ABAM Küm Tatem Mungdang nung agütsütsü.

(Signature)
(REV. DR. MAR PONGENER)
 Executive Secretary
 ABAM

(Signature)
(DR. MOANUNGSANG)
 Secretary
 Education & Literature, ABAM

Christian Institute tentetsang aser Director Colin Hart ajungbena asü



March 18, 2024: The Christian Institute tentetsang aser Director, Colin Hart ajungbena asüba sülen nisung aikati mangyim jashi lemsateper; pa arrshi küm 60

dang liasü.

Colin Hart ajungbena March 13 nü asü; pa temelungjang tashidak agi asü ta bilemer.

Christian Institute nung Acting Director, Ciarán Kelly-

i, Colin Hart ya tangar tenzüksü melungsentsü aliba lenir ka liasü, ta metetdaksü.

Paisa Hart'er kibong aser organisation atema sarasademjang, ta mepishia metetdaksü. "Ozü Director aser Khrista nung adianu, Colin Hart Kibuba den sentsüwangshi nung alitsü atema Kibubai jar ogo, ta ni tejashi nung nenok den lemsateper," ta Kelly-i metetdaksü.

"Iba takoksa atema onoki jashia mangyimer. Ajisüaka

teimla malirtemi mangyimba ama onoki mangyimer masü (1 Tesa. 4:13)" ta pai metetdaksü.

"Ajisüaka tangar tenzüksü atema kilir melungsentsü keta aliba nisung kati Kibuba aser Kümtetdakba Yisu Khrista tenzüksü atema The Christian Institute nem taküm bendanga agütsüba atema onoki Tsüngrem nem dang tenüngsang agütsür," ta Kelly-isa metetdaksü.

Trustees nung chairman, Rev. Dr. Richard Turnbull-i, "Colin dak aliba mangdang,

sempettem aser pa taküm atema onoki tenüngsang agütsür aser par kibong den medemertem atema sarasademtsür. Colin meteta alirtem nenok aikatia tenüngsang agütsünütsü aser sarasademtsünütsü," ta metetdaksü.

"Colin-i aginüba ama maneni wadang inyaksü. Nenoki nungitba atema pelar. Nenok sarasadem nung staff tem aser Trustees bilemetdaksüner," ta paisa mepishia metetdaksü.

**AO OSHI ANGAZÜKDAK:
TANÜ ANGAZÜKTSÜBA OJANG**



Soyapokya

(v) soa renloka aoba (increase in population)

* Nisungtem soyapokya aoba ya Adam aser Eve na nungi tenzük.

Soyim

(n) taso yim (native, birth place)

* Asenoki pei soyim meima anepalutsüla.

OLONG PAITEP # 6731

1						2				3
								4		
5		6				7				
8										9
									10	
				11		12				
		13								
14						15				
				16						

TIPIEN

- 1. O jembitsü tashi - 8
- 5. Süngjang tapu ka - 5
- 7. Tekanük nung enokba - 5
- 8. Teka amtep - 5
- 12. Tzük asendak - 5
- 14. Tsünpang tema aliba - 5
- 15. Ken atenba yimya - 5
- 16. Asangur - 8

LANGTSÜNGLEN

- 1. Tepok telung nung shilem ka - 7
- 2. Tamajung aküm - 5
- 3. Chi den külemi achiba - 3
- 4. Meimchir alimai aruba - 3
- 6. Laishiba nung ayong ka - 4
- 9. Tarutsü nükla - 7
- 10. Tamendakdak/Nükjidong - 4
- 11. Tenük-telen mejungi aküm - 5
- 13. Terok nungi adokba - 3
- 14. Meimchir telemsa - 3

OLONG PAITEP # 6730 TELANGZÜBA

TIPIEN :

- 1. Taa, 3. Teküm, 6. Aibelen, 7. Aut,
- 9. Ajizük, 10. Ojala, 11. Semer,
- 13. Sen, 15. Kioktsü, 17. Itsük,
- 18. Kar.

LANGTSÜNGLEN :

- 1. Tai, 2. Asensor, 3. Tanü, 4. Kua,
- 5. Mitsüktsü, 6. Azübenshi, 8. Lah,
- 9. Jangkok, 12. Akok, 14. Nashi,
- 16. Sür.

NAI-A YA METETTER MA



March 22, 2024 nungi IPL 2024 season tenzüktsü aser iba atema nisungtemi Opening Ceremony reprangtsü kanga yongyar. IPL Opening Ceremony ya MA Chidambaram Stadium, Chennai nung Chennai Super Kings (CSK)-i host asütsü aser CSK o Royal Challengers Bangalore tsüngda mezüngbuba match asayatsü.

Tezpur central jail nungi nisung asem jena ao

Tezpur, March 18, 2024

(Agencies): Assam kübok Tezpur central jail nung puoka alir nisung asem jena aoba sülen ketdangsürtemi parnok bushiteptsü tenzükogo.

Par asem ya Indajit Mandal, Zeherul Islam aser Thuleshwar Tati nung ta jangaogo.

Indajit Mandal ya West Bengal nungi lir aser Zeherul Islam o Thuleshwar Tati na ya Assam kübok Thelamara nungi lir.

Zeherul Islam aser Thuleshwar Tati na ya tanur apuba aser tanur dak tashiyim agi shi nung medemba atema tai

tonglokja lir.

Par asem jena aoba ajanga Tezpur central jail nung security maparen asoshi tebilemstü adokogo. Ketdangsürtemia parnok jena aoba indang bushisüngdang südar aser parnok tanaben pua arutsü atema inyakdar.

ECI-i Mizoram General Administrative Dept. Secretary anentsür

Aizawl, March 18, 2024

(Agencies): Election Commission of India (ECI)-i General Administrative Department, Mizoram Secretary agientsü tetuyuba agütsüogo.

ECI-i Secretary tenüng memetedaktsü saka pai iba menden toktsütsü imlar.

Election Commission of India (ECI)-i Gujarat, Uttar Pradesh, Bihar, Jharkhand, Himachal Pradesh aser

Uttarakhand nung Home Secretary agientsü tetuyuba agütsüogo.

ECI-isa Mizoram aser Himachal Pradesh nung General Administrative Department Secretary tem mapa nungi anentsüogo.

West Bengal nunga Election Commission-i Director General of Police (DGP) agientsü mapa inyakogo.

Parnokisa Brihanmumbai Municipal Commissioner Iqbal

Singh Chahal aser Additional Commissioners o Deputy Commissioners agienogo.

Mizoram nung April 19, 2024 nü Assembly elections agitsü. Mizoram nung vote enoktsür ajak agi 8,61,277 lir.

Aizawl district nung vote enoktsür teimtiba lir (2,88,268) aser tajemtibaji Hnahthial district nung voters 16,257 lir.

Arishi küm 85 ser temapur senior voters 4758 tashi kidang nungi dang vote enoktsütsü.

Assam Finance Service kati süpokrem agiba atema apu

Guwahati, March 18, 2024

(Agencies): Bangdak ketdangsürtemi bushisüngdang asüba ajanga Assam treasury officer ka süpokrem meshia agiba atema puogo.

Directorate of Vigilance & Anti-Corruption, Assam-i Harendra Nath Baishya Bania, AFS, Treasury Officer, Kamrup(M) apu.

Pai DC, Kamrup(M),

Guwahati nung stamps alizükba atema challan agizüktsü süpokrem meshi. Vigilance team-i tanü süpokrem agiba atema nisung asem apu.

Chief Minister's office kübok Anti-Corruption Branch-i Borobazar nung Child Development Project Officer Brijendranath Das apu.

Das-i Rs 4 lakh indang bill

nung sign asütsü atema Rs 30,000 süpokrem meshi aser Bijni Sub-Divisional Magistrate office nung pa apu.

Külen, Switch Board Operator-1, O/O APDCL Nanda Hazarika-ia süpokrem meshiba atema Nagaon nung par ki anasa apu. Pai commercial metre indang application ka agütsütsü atema süpokrem meshia liasü.



Manipur Human Rights Commission (MHRC) Chairperson Justice UB Saha (retired)-i Kangjong district nung aliba relief camp semdangba angur. Brihostibarnü Myanmar kübok Aung Zeya nung 37 tashi Manipur-i aruba osang Justice Saha nem sangokja liasü. Iba mapang Justice Saha-i Sangalok (Kheroram) aser Phaikhoh nung relief camps semdang. Tesem ana nung Chin-Kuki nung teimba ser Myanmar refugees 2000 tema jenoka lir.

**GOVERNMENT OF NAGALAND
OFFICE OF THE LABOUR COMMISSIONER
New Capital Complex
NAGALAND : KOHIMA
NOTIFICATION**

Dated Kohima, the Mar' 2024.

The Draft Nagaland Child and Adolescent Labour (Prohibition and Regulation) Rules, 2024, which the State Government proposes to enact, has been posted on the Labour department's official website- <https://labour.nagaland.gov.in/the-nagaland-child-and-adolescent-labour-prohibition-and-regulation-rules-2024> for information of all persons likely to be affected thereby. Any claims or objections in the proposed draft Rules are invited to be submitted to the department within thirty days from the date of this publication. No further claims and objections after the expiry of thirty days will be considered.

Any claim or objection with respect to the said draft may be sent to the Office of the Labour Commissioner, Nagaland, Kohima or email @ labcomm-ngl@nic.in before the expiry period so specified above.

(Er. S. L. WATI AIER)
Labour Commissioner,
Nagaland, Kohima.

Ukraine telungi NATO aitra World War III tenzüksü: Putin

Moscow, Metsüremi/March 18 (Agencies): Russia Tir Vladimir Putin-i election nung takok ngur jembidang, Russia tsüboa mali ta ashi, shiba küm 200 dak tema nung Russia lenir talangtiba inyaker kumogo.

"Nenoki yariba aser tamang akaba atema nenok ajak aser linük senso ajunga dang pelaba lemsateper. Parnoki asenok komarka tsübodaktsütsü merangaka, parnoki komarka asenok ajemreptsü merangaka, asen temulungtetba, aser mulungsentsü - item yabo puti otsü nung shingaia koka mali. Tang tashi meinyaktet aser tarutsü nunga meinyaktetsü. Kodanga makoktsü,' ta Putin-i Hombarnep ashi.

Russia aser US-i aniba NATO military alliance tsüingta rara adokra World War III tenzüksü akok, ta Putin-i tekum dangtsü ashi. Tetetzü alima nung World War III tenzüksü mera ka dang lir. Ajisüaka shingaia iba tensa maginer, ta paisa ashi.

France Tir Emmanuel Macron-i tan hopta French television den sensaksem dang aser taoba ita jembidang Russia dak tenük yoker amai liasü.

Russia nem Ukraine rara mokokdaksütsü France-i inyaksüla, ta Macron-i tan hopta ashi aser taoba ita pai tarutsü nung Ukraine leni sepai meyoxtsü ta meshitetsü, ta shia liasü.

Macron-i jembiba nung telangzüba agütsüdang, tanü-asüng lima nung ajak takoktsü, ta Putin-i ashi. "Iba ya World War III tenzüksü mera ka dang lir ta ajaki jangja lir. Ajisüaka shingaia ibaji jangra malitsü amai bilemer," ta Putin-i ashi aser tongpang nunga English aser French oshi jembiba angazükogo ta shisem.

"Yangi tajung kecha mali, mezüngbuba nung parnok atema, kechiaser parnok yangji nisung aika asür," ya pai election nung takok tulu anguba sülen ashi.

Election tenzükba anogo,

Hokulbarnü-sa EU tekolakba Charles Michel-i anemsü agi Putin-i takok tulu anguba atema tepela lemsatepa liasü.

Pa ya kümsük tema inyakra, 18th century nung Catherine the Great sülen Russia lenir talangtiba inyakerji pa alitsü.

Taoba ita asüsang Navalny indang yimjak nung mezüngbuba jembidang, pa asüba ya tejashitsü mapang ka liasü, ta Putin-i Hombarnep ashi.

Küm aika nung tang mezüngbuba pai yimjak nung Navalny tenüng amshia jembidang, "Navalny atema. Hao pa süogo. Ibai teti asoshi tejashitsü tatalokba ka lir," ta ashi.

Putin-i ashiba agi, külemi mapa inyaker kati Navalny ya Western linüktem nung tang tepuokdak yua alir nisung kar den melenteptsü pa masüdang asüngdanga liasü.

"Kü den jembisangi pa o matemdang ni mulunger ta langzüa liasü," ta Putin-i ashi.

(Maneni tapak 8 nung...)

North Korea-i ballistic missile ka tendangogo

Seoul, Metsüremi/March 18 (Agencies): South Korea nung democracy summit ka lapoktsü atema United States Secretary of State Antony Blinken renema aliba mapang North Korea-i Hombarnep linük anütok tzükümleni short-range ballistic missile ka yokogo, ta ketdangsurtemi metetdaksü.

"Norh Korea-i linük tzükümleni mejangjaba ballistic missile ka khaketa yokogo," ta US Joint Chiefs of Staff-i ashi.

Japan Coast Guard-ia iba missile khaketa yokba jangjatsüogo.

US aser South Korea na longjemmer anogo 11 Freedom Shield joint military drills ayongzüka agiba sülen anogo ishika lir North-i iba missile khaketa yokogo.

US aser South Korea nati military drills ayongzüka agiba ya North Korea-i aitsüogo aser ashiba agi, iba ya parnok amaktsü atema terenemshiba ka lir.

Pyongyang-i iba ita tetenzüklen Seoul aser Washington na dang taküm Freedom Shield drills ayongzüka agiba khuret parnoki abentsü ta shiogo, kong taoba küm dang nungi sepaitem anasü agi timbai shilem agiogo.

South Korea nung US nunger sepai 27,000 shi

amenoka lir, kong drill ayongzüka agia liasü.

North Korea-i taküm missile aika tendanga arudar aser Hombarnep tendanga ya tatemsabuba asütsü. Parnoki January 14 nü manoeuvrable hypersonic warhead missile-a ka tendangogo.

Missile yokba sülen mapang tatsüka dang lir Blinken aser South Korea Tir Yoon Suk-yeol nati Democracy Summit lapokba sentong nung shilem agia liasü, koba takümbo South Korea nung ayongzüka agidar.

Blinken aser Yoon napronglai democracy ajungmesotsü atema technology koda amshitetsü iba indang jemi. Tenatisa kasa technology ajanga democracy nung

tetsükdaksü adokdaksütsü akok ta ashi.

US House of Representatives nung taoba ita bill ka agizükogo aser iba ajanga nungtugu social media app TikTok, koba Chinese developer ByteDance den longjemmer yangluba lir iba ya nokdangtsü akok. US nung iba jenjang agir aliba mapang Hombarnep Blinken-i summite nung technology indang iba olen ya lemsatepa liasü.

Democracy summit ya US Tir Joe Biden-i apitetba sentong ka lir aser taoba mapang linük teshimtet kar dang jaokba atema taitüsü aika ajangshiogo. Iba summit atema Thailand aser Turkey na densema linük karbo mejaoki liasü.

PELABA LEMSATEPER



Asür Imnanuklu Ao
20.02.1961 - 11.03.2024

Onoki teti meima aliba Obala asür Imnanuklu Ao (Changtongya) 11th March 2024 anogo nung iba alima nungi piladang kija, kibong, Arogo aser lokti balala shirnokisa pei taküm, nübu, sarasadem aser rongsen agi ozü mangyim jashi nung alidang yaritetsüsa nenok ajak dang pelaba metetdaksür. Oda ozüi nenok dangi tsüngdong aruaki meshitetaka asen teyanglur takoksang Tsüngremi nenok taküm aser kibong moajang ta ozü sarasadem.

- Temeim kinungtsü, chirnurtem aser semchirtem.

OFFICE OF THE LONGJANG JAMIR KIDONG TELONGJEM MOKOKCHUNG : NAGALAND. TENÜNGSANG AGÜTSÜR



Longjang Jamir Kidong Telongjem ajanga Wb.Marnungba Jamir aser Wt. Imsülemla Yaden jabaso Wb. Imlisanen Jamir, Longjang yim nungi Nagaland government kübok Agriculture Department nung Inspector (Class-III Non Gazetted) mapa ngutetsüsa 2023 küm NPSC ajanga agiba tatidang nung takok tajung nguteta konang nungsang bener arutsüba atema pa nem tenüngsang tulu agütsür. Tsüngremi nü taküm aser wadang nung ano maneni moajangma.

Sd/-
Akangtemjen Jamir.
President, LJKT.

Sd/-
Bendangyanger Jamir
General Secretary, LJKT.

Office of the Mopungchuket Senso Telongjem Kohima Kohima : Nagaland

TENÜNGSANG AGÜTSÜR

Mopungchuket Senso Telongjem Kohima (MSTK) aser Ao Temulungtsür Telongjem Kohima (ATTK) ajanga züngsem tajung ana sorkar mapa nung aser shisaliok bushiba nung temaba jenjang ngutetba asoshi tenüngsang tetushi agütsür aser pelaba lemsateper :

1. **Er. K. Imnajungba Jamir**, sorkar mapa nung temaba jenjang, Chief Engineer (PWD), Govt. of Nagaland tongtetba.
2. **Dr. Anettsüngla**, D/o. Mr. Korasashi Jamir shisaliok bushiba nung Doctor of Philosophy (Ph.D) degree anguba. Lai züluba thesis, "Magnetic susceptible, petrology and geochemistry of granitoids in parts of Karbi Along Hills, Assam", Department of Geology, Nagaland University, Lumami nungi.

Asen teyanglur Tsüngremi tena-nem maneni anema aliba taküm, takok aser shisatsü tajung nübortem asoshi tena inyakba wadang ajak nung moajangma.

Sd/-
L. Asenla
General Secretary, ATTK

Sd/-
Onen Ozükum
President, MSTK

**Office of the
AO RIJU
Mokokchung : Nagaland - 798601
"Kenozülu Yinsem"**

Ref.No. AR/AT-SD/03/2024 Date: 18/03/2024

SANGDONG

Ao Riju-i achaayanga agiba Arangtet Tatidang (AT) 2024 Tanabubaren atema Shiyim (Form) Metsüremi 20, 2024 nungi tekübok agüja aliba tesemtem nung tongtepratepa inyaksü sangdonger:

i) Wb. Aotemjen Jamir : M/No. 8731821467 (Kohima)
ii) Wb. P. Alem Jamir : M/No. 7005501457 (Dimapur)
iii) Ao Riju office : M/No. 9089816427 (Mokokchung)

Agüja aliba tesemtem nung meinyaktetbapurtem ajak office den tongtepratepa inyaksü metetdaksür. Iba AT nungzülu Rongchii 30, 2024 tashi alitsü, iba sülen aruba magizüktsü.

Sd/-
Rev. Prof. Rongsen Lkr
ChairmanSd/-
S. Wati Ozükum
Secretary

Israel sepaitem Gaza nung al-Shifa mozüki telungi ait

Gaza City, Metsüremi/ March 18 (Agencies): Israel indang mitkartem tanks aser hadir tulu bener Gaza City nung aliba al-Shifa Hospital telungi aitba ajanga nisung asü aser yiru, ta Palestine ketdangsurtemi ashi.

Israel mitkari Hombarnep

sangdong ka nung parnoki medical facility nung "precise operation" ka agir ta shia liasü. Gaza indang Ministry of Health ajanga ashiba agi, iba mozüki telung nung tesem balala nungi arua jenokba civilian tem, yirur alirtem aser medical staff densema nisung

30,000 shi lir.

Israel yagi Hamas indang military infrastructure tem raksatsüogo ta hopta ishika tejaklen shia northern Gaza nung operations aika anenogo, saka sangdong ka nung Hamas telok ya al-Shifa telung nung adenshir aser Israel dak

amaktsü atema command ka ama amshir, ta shia liasü.

Gaza indang Ministry of Health ajanga Telegram nung English oshi nung message ka agütsüba nung, shibasa arakzüksü merangdir sniper bullets aser quadcopter agi akhar, ta shia liasü.

Anepdang 2:00 ako nungi iba mozüki meita aoba nung nisung aika asü aser yiru, ta ministry ajangasa ashi.

Israel-i bomb pokloktüsü sülen iba mozüki indang surgical building nung mi adoka liasü, ta osangbeneri ashi.

(Maneni tapak 8 nung...)

5th Mokokchung Inter-Ward Football Tournament 2024 osang (Artang o Mongsenbai na semifinal tongogo)

Mokokchung, Metsüremi/ March 18 (TYO): March 12, 2024 nungi tenzüka Imkongmeren Sports Complex, Mokokchung nung 5buba Mokokchung Inter-Ward Football Tournament 2024 asaya-a arudar. Iba asayamung ya Marepkong Youth Association-i football asayar jangrartem ajungshitsü asoshi kümshi ayongzüka akar, aser taküma "rise as one" omen dak rangloker ayonga asayadaki.

March 18 nü nungi tenzüka quarterfinal match asayadaki. Tanü mezüngbuba quarterfinal asaya Pool 'A' winner Artang Ward o Pool 'B' Runner Majakong Ward na asayaba, Artang-i goal 3-1 agi koka parnokbo semifinal asayatsü jenjang ajangzükogo. Iba asaya nung mezüng goal-ji Majakong nungi jersey No. 15, Imkong-i idaktsü, saka iba goal-ji kopi meli-i Artang nungi jersey No. 21, Alemjungba-i minute 26 nung

küptok aser asaya mezüngbuba shilem kasasa nung atem.

Asayartem anisüngzük agir külen, Artang nungi jersey No. 11, Chubalemba-i minute 53 nung goal ka aser minute 65 nung goal ka ta yoka iba asaya goal 3-1 agi Artang-i Majakong madak takok tulu nguteta liasü.

Tanabuba quarterfinal asaya, Pool 'C' winner Mongsenbai Ward o Pool 'D' runner aser defending champion Sangtemla Ward na asayaba, Mongsenbai-i goal 1-0 agi akok. Iba asaya nung takokba goal kaji Mongsenbai nungi jersey No. 7, Longkhoi-i asaya tanabuba shilem tenzüker minute 10 dang or lia agütsü. Sangtemla telokia goal agütsütsü kanga merang, saka goal kaji meküpzükteki asaya mapang tematok.

March 19 nü tasembuba quarterfinal match ji Pool 'B' winner Arkong Ward o Pool 'A' runner Alempang Ward tsüngda nikong 1:00 ako nungi tenzüka

asayatsü aser pezübuba quarterfinal asayaji pool 'D' winner Sungkomen Ward aser pool 'C' runner Tongdentsuyong Ward na nikongdang 2:45 nungi asayatsü.

Asayamung shir ward-i bendir parnok nem senpet sen 50,000/- (fifty thousand) den trophy aser certificate, aser atongdakba nem 30,000/- (thirty thousand) den trophy aser certificate agi senpettsü. Iba den nija senpet - best goalkeeper, highest scorer, best defender aser player of the tournament-tem shima senpettsütsü.

Otsü reprangdangra tang tashi nung, mezüngbuba Mokokchung Inter-Ward Football Tournament-ji Arkong Ward-i aben, tanabubaji Artang Ward, tasembubaji Mongsenbai Ward aser pezübubaji Sangtemla Ward-i aben. Taküm pungububa asayamungji shibai abentsüar nüburtemi yongyaseta atar.

Alcaraz & Swiatek nati Indian Wells ATP-WTA asayamung kokogo

Metsüremi/March 18, 2024 (Agencies): Deobarnü Indian Wells ATP tebur kija asaya final nung World No. 2 asayar Carlos Alcaraz-i 7-6 (7/5), 6-1 agi Russia nung asayar Daniil Medvedev koka iba asayamung küm anabuba atonga kokogo.

Taoba küm July ita Wimbledon akokba sülen Alcaraz-i tang mezüngbuba asayamung ka kokogo aser pa ya Novak Djokovic sülen iba asayamung anaben atonga akokba mezüngbuba asayar kümogo. Djokovic-i 2014 nungi 16 tashi nung iba asayamung asemben atonga koker lir.

Arishi küm 20 tain Spain nung asayar Alcaraz atema iba asayamung akoktsü kanga tongtibang liasü, kechiyong pa ita aika junga masayateti aruogo, kong Australian Open nung quarter-final nung tsükba aser February ita Rio de Janeiro nung asayaba mapang tetsüng teloktep

yiruba ajanga mezüngbuba round nung tuguatoktsüsa akümba densema lir.

Taoba küma Alcaraz-i iba asayamung final asaya nung Medvedev tsükdaksüogo, shibai ATP indang hardcourt Masters 1000 titles trok rongnungi iba asayamung ya dang mekoki lir.

World number four asayar Medvedev-i final asaya kanga junga tenzüker aser mezüngbuba set nung pai Alcaraz indang serve break süa pa 3-0 agi tejakdang aküm.

Ajisüaka game pongububa nung Alcaraz-i Medvedev indang serve break asüba sülen tena kasasa dang atu aser tie-breaker asayatsüsa aküm koba Alcaraz-i koka liasü.

Iba sülen tanabuba set nungbo Alcaraz-i tajungba asayateta pai asaya 6-1 agi ayong ayonga akok.

Kasa asayamung tetsür kija asaya final nung World No. 1 asayar Iga Swiatek-i Greece

tsür Maria Sakkari 6-4, 6-0 agi ayong ayonga koka lai Indian Wells WTA title anabuba benogo. 2018 küma lai final nung Sakkari koka liasü.

Mezüngbuba set nung tera toktepba asayaba sülen tanabuba set nungbo Swiatek-i asaya amokbanger asaya-a pai asaya ayong ayonga akok aser la indang career nung asayamung 19buba kokogo. 2024 küm lai tang agi asayamung anabuba kokogo.

Australian Open nung tasembuba round nung tsükba sülen Swiatek-i kanga junga asaya arudar aser Lai Doha Open kokogo aser Dubai nung asayamung nunga semifinal tonga asaya liasü.

Deobarnü la ya arishi küm 23 majung tsüngda Indian Wells asayamung ana akokba asayar 10buba kümogo aser Serena Williams o Kim Clijsters nung den densemogo.

Lakshya Sen Olympic asayatsü atema timla mesamai lir

Metsüremi/March 18, 2024 (Agencies): Commonwealth Games koker alisang India nung asayar Lakshya Sen Paris Olympics nung asayatsü atema timla mesamai lir. Pa taoba hopta asayaba French Open badminton asayamung nung semifinal tonga asayaba sülen latest Olympic Games Qualification rankings nung jenjang 15bubai tuogo.

Almora nungi arishi küm 22 tan asayar ya 2022 küm November ita world number 6 aküm ajisüaka pa taoba küm April ita world No. 25-i asepzüka alu. Iba sülen August ita pa 11bubai atu saka taküm küm tetenzüklen asayamung ishika nung kanga kara tsükatokba sülen 20bubai

asepzüka lua liasü.

Pa Malaysia Super 1000 aser India Super 750 nung mezüngbuba rounng nung tsükatokba sülen hopta ishika Olympic Games qualification rankings nung jenjang 19buba nung dang liasü saka taoba hopta Paris nung junga asayaba sülen pa indang point 74,897 kümogo.

Maneni Sen BWF World rankings nunga jenjang ka tejakdangi tua tang 18buba nung lir. Ajisüaka 2023 World Championships bronze medallist HS Prannoy taoba hopta Paris nung mezüngbuba round nung tsükba sülen jenjang ka asepzüka lua tang world ranking aser Olympic Games qualification nung tibuba nung lir.

Ajisüaka India nung tebur asayartem rongnungibo pa temaba jenjang nung lir.

April ita tatem tashi nung world rankings nung top 16 nung aliba asayartem Olympics nung asayatsü atema maongka angutsü.

Tetsürtem rongnung PV Sindhu (60,742), shiba taoba hopta Paris nung quarterfinal nung tsüka liasü la Paris qualification rankings nung 13buba nung lir.

Kasa mapang nung French Open champions Satwiksairaj Rankireddy aser Chirag Shetty na BWF World ranking nung temaba jenjang nung lir, ajisüaka Olympic Games qualification nungbo tanabuba jenjang nung lir.

BENDANGLI OSANG : Tapak 7 nungi...

Ukraine telungi NATO aitra World War III...

Putin anemer tejangja asür Alexei Navalny tembar temi election nung Putin-i takok angutsü aliba ya nokdangtsü meranga voters tem dang anüngdang teroto nung polling stations tem nung adenshia pei vote raksa indoktsü ayongzüka liasü.

Alexei kinungtsü Yulia Navalnaya ya Berlin nung la bhumer temi naro amokba teka maa agizüka liasü. Russian embassy nung vote agütsüba sülen la indang ballot nung la kinungbo tenüng zülutsü ta ashi.

Hokulbarnepe tashinung arishi küm 71 tain Putin-i vote shilem 87.8 ngur liasü, ta Public Opinion Foundations (FOM) ajanga exit poll agiba nung shia lir. Russian Public Opinion Research Centre-ia Putin-i vote shilem 87 nguteta lir ta ashir.

Pa den tokteper Communist candidate Nikolai Kharitonov ya tanabuba jenjang nung vote shilem 4 nguteta liasü, yimtenren nung nübu tasen Vladislav Davankov ya tasembuba aser ultra-nationalist Leonid Slutsky ya pezübuba jenjang nung liasü.

Iran Tir Ebrahim Raisi-i Putin nem election akokba

asoshi tenüngsang agüja liasü. China sorkaria pa nem tenüngsang agütsü. "China aser Russia ya kidanger linük tulutiba ana lir aser putu tasen nung strategic cooperative partners lir," ta Foreign Ministry odongtar Lin Jian-i osangbener senden ka nung ashi.

"Tir Xi Jinping aser Tir Putin lenisüba kübok China-Russia tesendaktep maneni tejakleni aotsü tamang lir aser taküm ya linük ana tsüngta tesendaktep tenzüker küm 75 ajunger," ta Lin-i ashi.

Hombarnüa Putin-i China nem tenüngsang agüja liasü aser China aser Russia nüburtam asoshi külemi takok angutsü aser tesendaktep tali tajungba yangertsü, ta shia liasü.

"Sorkar tejangraba kasa dang aser ibaji kanga tongtipang lir. Iba yagi international tesendaktep nung arok tebilemstü koktettsü asoshi tejemiba tajung ka adokdaksür," ta Putin-i ashi.

"China indang rongsenketzüng melenshia aor. Russia nunga kasaji ajangshia lir," ta pai ashi.

Israel sepaitem Gaza nung al-Shifa...

Kasa mapang Al Jazeera Arabic indang correspondent Ismail al-Ghoul ya mozüki telung nung lia Israel sepaitemi apu aser züka merenshi ta ashir.

"Arakzüba ajak dak parnoki injang khaloktsür. Doctors aser ambulance tem marakzüteter," ta pai ashi.

Hombarnü Israel mitkar temi sangdong ka nung, parnoki mozüki nung Hamas den khatepba mapang sepa ka asü, ta sangdong.

Arishi küm 20 tain Staff Sergeant Matan Vinogradov asüba ajanga Gaza rara nung Israel sepa asür 250 jungogo.

Israel mitkar indang odongtar Daniel Hagari-i video ka X nung lemsatepba nung Israel mitkar temi

"humanitarian effort" ka inyaka chiyongtsü aser tzu agütsütsü, ta shia liasü. Shirangertem aser medical staff tem mozüki nungi ainshitsü atema tenokdangba kecha mali, ta pai nenshia ashi.

Ajisüaka Hombarnü Israel mitkar temi Al-Shifa anasa aser Gaza City kübok Remal

kiyong nungi civilian tem south tsütsü jena aotsü metetdaksü.

Israel army temi leaflets tsükdaksüba nung nüburtam dang Khan Younis anüolen al-Mawasi evacuation zone leni aotsü totuyuba agüja liasü, anungji Hagari-i ashiba den meputeper.

Gaza nung aliba Government Media Office-i iba operation aitsü aser ibai "war crime" lir ta ashi.

"Alima külakoktsütsü aser al-Shifa mozüki sabangba kuli atema Israel-i tang tashi tiazü jembir," ta sangdong nung ashi.

Hamas indang military operations ya mozüki aser danga medical centres tem nungi inyaker ta Israel-i aiben jembia arur saka iba telok yagi magizüker.

Mozüki temeket nung alirtemi nisung aika yirur lir ta onok dangi call asür, saka injang-bomb ola tanen makai angashiba ajanga kecha mesütetr, ta ministry ajanga ashi.

Rara tenzüker Gaza Strip nung health facilities 155 raksatsüogo, ta UN-i ashir.

BILEMDANGANG

"Temulungsentsü merek mereka alitemi tia tensa ajak nung tajung dang reprangteter."